

's Jesuskendle ond dr Batman



Heutzutage hend de Jonge koin Respekt meh vor ra Krippe mit ihra statische Darstellung von dr Heilsgeschichte en Holz oder Plasztik. Dr Jong von meira propera Nochbere, a 7-jähriger Kerle, hot zwischa de Johr oifach mit dene Krippefigura g'spielt. Mir hättet domols da Arsch voll kriegt, wenn mr die zerbrechliche Gipsfigürle au bloß scharf a'guckt hättet. Der Kerle aber hot net bloß mit dene Figura gespielt, sondern se au no mit andere Plasztikfigura aus seim Spielzeugarsenal ergänzt, wie wenn mr die Weihnachtsgschichte oifach so erweitra kennt. Dr Heilige Josef isch durch da Batman ersetzt worda. Der hot au en schene Mantel a ond wahrscheinlich

hot dr Jong denkt, dass der fliegende Maskamann ama Engel am näggschda kommt. Ox ond Esel hot er vorsorglich voma gigantische Tyrannosaurus Rex auffresse lassa. Der hot no au glei da Platz neba dr Krippe eignomma. Dui Krippe isch allerdings durch an schwarza Porsche 911 ersetzt worda, auf dessen Beifahrersitz der neugeborene Heiland mit ama jesemäßige Tempo durch da Stall grast ischt. Wahrscheinlich hot'r denkt, dass an Kenig au standesfahra sott. Die Hirta send a paar blaue Schlümpfe gwää, die em Spiderman nochguckt hend, der uf em Dach von dere Krippe romkräbselt



gemäß

ischt. Die Heilige Drei Kenig warat Plasztikfigürle vom Bastian Schweinsteiger, vom Lukas Podolski ond vom Klinsi – also richtige Helda. Bloß hend die koi Weihrauch, Myhre ond Gold brocht, sondern an GameBoy, Harry Potter Band 4 ond a leers Päckle Chicken McNuggets vom McDonalds. An Silveschter hot dr Jong no des Jesusfigürle an a Rakete vom Aldi nabonda ond en da Orbit g'schossa. Vermutlich fühlt sich der Christus noch dere feurige Himmelfahrt dort oba viel besser als bei Batman, Schlümpfe, Tyrannosaurus ond Porsche 911.

An guads, xonds ond chrischtlichs nuis Johr wensch
Ihr
Wulf Wager